

# TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

**Pablo saruhuatasacari Pueyaso pueya  
maanu Corinto tiacajinia**

**1** <sup>1</sup>Janiyari Pablóni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaara naajiyani, puetunu Acaya jiyajinia Pueyaso tojtijajaca pueyacuaraajanaanio. <sup>2</sup>Pa Que Pueyaso, mariyata pa Jiyaniijia Jesucristo cuara cumaquiiiria niajaniya. Nojori cuara jiyateera niajaniya juhuajaniya quijiaca nia quiniuria.

**Pablo miishacari naquiya**

<sup>3</sup>Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumaniijiana. <sup>4</sup>Nojuajaari pueyaracaanu pa cumaniijaquiaa naquiya pa miishacari. Naacuajiti pa naata cumaniijianu tamasacajuhuj, naquiya nojori miishacari, taa Pueyaso cumaniijaquiaa pajaniyacuaani. <sup>5</sup>Seetanujuanaa, Cristo rupuejaca pa quishacari, paari naquiya miishaaquiaajuahuaj, taa naquiya na miishaaquiaaricuaani. Naajaa, nojuajaari pa cumaniijaquiaa shuquiriaatia pa quiniuria. <sup>6</sup>Naacuajitij, canaa jaara

naquiya miishaaquiaa Cristojiniji canaa pohuatanuucuaani, Pueyasoori canaa cumaquiquiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niqiara, seetanujuanaa Pueyaso pueya nia quiniuria, nia cumaniijaasaanurajuhuj. Naajuhuj, Pueyaso jaara canaa cumanijiarecuaa, naacuajitij, canaa naata nia cumanijianujuhuj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. <sup>7</sup>Canaari seetanujuanaa niaacua tiuyani, niaari cumaniijaasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniucujuhuj, taa canaa miiquiaa naquiyacuaani. Naacuajitij, Pueyasoori nia cumanijianutaniyajuhuj, taa na cumaniijaquiaa canaacuaani.

<sup>8</sup>Canaa panishano Pueyaso pueyanaa, canaari panyani nia niishiniuria taa canaa tacaakuanuni, jiyanohua naquiya canaa miishacari Asia jiyajinia. Canaari puera jiyanohua taraatia miiquianuni. Jiyacari, majaari tari canaa jitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya. <sup>9</sup>Seetanujuanaa, canaari jyanijiani Pueyaso naasucuari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari

canaa niishitiriquiaa maja canaa tiuuniuria tama canaacuajaaja, saaja nocua canaa tiuuniuria cutara. Nojuacuajaari macanucua samiitianijiojua. <sup>10</sup>Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secorejehuaj. <sup>11</sup>Naacuajitij, Pueyaso miishacari maninia canaa, queraatia pueya secjonuucua canaacuarajuhuaj, queraatia pueyari Pueyaso sequenutaniya, “paacarasho”.

**Pablo pahuatasano casaara na quiaaquiuaari Corinto pueyacuani**

<sup>12</sup>Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijiaca niquiaranio. Majaari canaa sapojonu quiija nijaniya. Canaari seetanujuanaa niaacua taraajejani Pueyaso jiyatenuucua canaa nia panijiaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitijatajaaja. <sup>13</sup>Cunora, janiyari nia nequesotaani, ¿casaara nia cushitiquianu canaa naajione nia serojosacarini? Puetunu canaa naajioneecajinijanaa majaari canaa naajionu quiquiaa jiyajeneta casa, nia cushitiiniuria. Puetunjuanaacuajaari maatia niishishaa-tia quiquiaa nia serojosocoriquiano. <sup>14</sup>Niaacuajaari tari secaja niishiya taa canaa paniya jiyano hua nijaniyani. Pa Jiyaniija Jesucristo tiuquishacarihua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaca quiquiaarini. Naajuhuaj, nijaniyari canaa timitiasano quiniutianiyajuhuaj. <sup>15-16</sup>Cua jiyaniyacari niaa naasucuaari seetanujuanaa cua panijiaca, taa cua

paniquiaa nijaniyacuaani, janiyari cunora naquerejocanu niaacua juucuan. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacari. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuaj, cua tacatesacarihua cunocojihua. Janiyari niishiriojoriquiaani nia naata naasucua cua naacunu cua panishanotajuhuaj, Judea jiyajinia cua quianuhua. <sup>17</sup>¿Niaateeri jiyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuuaa miiniu paniquianuni, maja Pueyaso panishano? Seetanujuanaa, majaari coojia cua niquijiotenu quiquianu naa cua sequesacari nijaniyatej. <sup>18</sup>¿Janiyateeri coojia niquijiotejani? Maja. Canaa pahuatasacari Pueyaso rupaa nia niquiara, ¿canaateeri na jataniquiaani? Pueyasocuajaari niishiya, na rupaa canaa pahuatasacari, majaari canaa jataniniu quiquiaa. Pueyaso rupaacuajaari seetanujuanaa. <sup>19</sup>Naajuhuaj, Neyanu Jesucristoori jataashijia. Silvano, Timoteo, janiyajuhuaj, canaari nojuajiniji nia niquiara pahuatanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. <sup>20</sup>Jesucristocuajaari tari tohuateequiaari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritiasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. <sup>21</sup>Jesucristo rupuejaca pa

quishacari, Pueyasocujaari pa cumaqui-quiaa, socua maninia na tojjijaca canaa quiniuria, nijaniyajuhua. Pueyasoori pa niqutioquiaari na Sohuanu, seetanujua-naa na muerasu pa quiniuria. <sup>22</sup>Pueyaso Sohuanu pa jiitiasacari poojiajinia, naacuajitij, paari tari Pueyaso sesa jiitiaa juhua naajiotasano poojiajiniani, saa neraja pa quiniuria. Na Sohuanu pa jiitiasacari poojiajinia, paari niishiyani, paari puetunu na sequesanojuanaa maseriquianoni.

<sup>23</sup>Niaari cua jiyaniquianu janiyari najuhuaa coojia niqijiotejani, niaacua cua quiaaquiniuucua taa cua sequecanu coteenu nijaniyacuajani. Pueyasocujaa-ri niishiya, majaari cua quianu quiquianu niaacua Corinto tiacajinia, maja cua tacaatiniuria nijaniya, janiya jaara nia nacasusee jiyanohuani. <sup>24</sup>Canaari maja nia jiyaniijiani canaa shiniujuniuria puera nijaniya, Jesuucua nia tiuuniuria. Niaacuajaari tari maninia Jesuucua tiujujaca. Canaari saaja niarta Pueyaso pueyani, canaa cumaquiniuria nijaniya, socua pa Jiyaniijia tojjijaca nia quiniuria, seetanujuaana shuquiriaatia quijijaca nia quiniuria.

**2** <sup>1</sup>Janiyari tama sequecanujuaanijia, maja juhuari niaacua cua quianu quiniutianiya, maja cua taraajetenura nijaniya. <sup>2</sup>Janiya jaara nia taraajetere cua nacasusacari nijaniyani, ¿cantucua cua timitiri quenaajani? ¿Cua taraajetesa-no pueyateeri cua shuqiritiniutianiya? Maja. <sup>3</sup>Naaratej, janiyari niaacuara naajiocanuni, cua nacasunura juhuacari-ja nijaniya, cua taraajeyaquiniuria niaacua cua tiuquishacari. Janiya jaara sashiri cua nacasunura nijaniya cua tiuquishacari niaacuani, janiya maara jiyanohua nia taraajetereni, jecatoojua nia quishacari. Saniniujujia, niaa jaara juhuacarijia jecare puetunu sesa nia miishanojuanaa, naacuajitij, cua

tiuquishacari niaacua, niaari cua cojiniutianiya maninia, shuquiriaatia pa quiniuria jatiqiu. <sup>4</sup>Janiya jaara niaacuara naajiocanu coteenu cua naajioneeni, janiyari jiyacari jiyanohua tacaariquiaa niaacuani. Coojiaari jiyanohua taraajeri-quiaa. Janiyari jiyacari nujuqueriquiaajaaniuhua. Majaari cua naajionu quiquianu cuno naajionee cua taraajonura nijaniya. Cunoori seetanujuaana quiquianu cutara cua niishitiniuria nijaniya, taa cua paniya jiyanohua nijaniyani.

**Cuno sesa miijia cuaara jiyanooshaaria jaara tari pishirii sesa na miiniujiniji**

<sup>5</sup>Cuno sesa miijiaari maja na taraajetenu quiquianu saa janiyaja. Quera puetunu nijaniyajanaa naasucuuari taraajecanu cuno pueyano miiniuucua sesa. Seetanujuaana, majaari puetunu nijaniyajanaa taraajenu quiquianu. Janiya jaara sequerene: “Puetunu nijaniyajanaari taraajecanu”, janiya maara puera na maateyani. <sup>6</sup>Puetunu nijaniyajanaa jiyatenuucua nojuaja saniitiosano na quiniuria, nojuajaari tari noojia tacatorohua sesa na miiniujiniji. Tariucujaja. Majaari socua na saniitonu. <sup>7</sup>Quiarijiani nojuaja nia jiyanoorohua. Nia cumanijiarohua, nojuaja mariqui puera tacaariiri jiyanohua na taraajesacari. <sup>8</sup>Nocuaari janiyari jiyanohua nia rootaani, maninia nia miiriohua cuno pueyano, na niishiniuria niaaqui na panijajaa. <sup>9</sup>Janiyacujaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuaana pa Jiyaniijiajiniji cua rootasano tojjitajaca. <sup>10</sup>Cua tojjitiae, cana nia jiyanooriicuani, janiyari na jiyanoyajuhua. Naacuajitij, pueyano jaara sesa miiriquia, janiyari Cristo niqiara na jiyanoquiaajuhua, jatiqiu nia quiniuhua. <sup>11</sup>Naaratej,

niarta Pueyaso pueya nia jiyanooriquia, Sesaaca mariqui pocua riuticoreeri, juaajiaara na jiyatenura pajaniya, pa jiyanootioyaquiniuucua. Paacuaajaari maninia niishiyani taa Sesaaca niishirio-joquiaa sesa mijiacara na jiyatenura pajaniyani, paa jaara jiyanooyashijia quiriqiuani.

**Pablo tacaashacari Troas tiacajinia na quishacari**

<sup>12</sup>Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanhua tojitianu paniriquiaa Jesujiniji cua pohuatanura juucua. Jiyacaritij, seetanujuanaa nojori niqiuara pohuatasaaatia quiriqiuari. Pa Jiyaniijia Jesuuri juhua tiotiu riatacanu cucuaji juucua, cua pohuatanura nojuajiniji tii. <sup>13</sup>Janiyari saaja nojori tiujiacanuhuanu puera cua tacaashacari, cua riuriataaquiniuucua pa tarajanu Tito. Janiyari juucua paniriquiaaani cua pohuatasaanura nijaniyajiniji. Janiyari cunora tacaariquiaa jiyanoahuani. Naaratej, janiyari Macedonia jiyajinia quiaarohuani, Tito cua pajenuhuara tii.

**Pa Jiyaniijia Cristoori pa paraa pa shocotaniijia**

<sup>14</sup>Janiyari jiyanhua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyacaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijiirihuhua shanhua jaanutaja jaanujuquiaa pueya tajinia puetunu tiquiyocujanaa. <sup>15</sup>Pueyasora, canaari juhua shanhua jaanutajani, Cristo quishacari canaa jiuujiajinia. Nojuajiniji canaa pohuatanuusacari, canaari puetunu pueyarajanaa jaanuquiaani: Pueyaso muerasurano, saniitiosaariquiano pueyaranio.

<sup>16</sup>Saniitiosaariquiano pueyara, Jesucristo rupaari mocuaatia jaanujua saniniuuja. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuuja, Jesucristo rupaari shanhua jaanuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaninya. ¿Canapueeteeri seetanujuanaa Pueyaso jiyaramiquishanoni, na rupaa nojori pohuatanura, pueya na tiuutiniuria Jesucristoocuan? <sup>17</sup>¿Noo pojoritii, najuhua Pueyaso rupaa pohuatanuucua, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niqiuarani, Cristo rupesano canaa quishacari.

**Quiarinio rupaa Jesucristojiniji**

**3** <sup>1</sup>Naa canaa naajiosacari niaacuara-tej, niaa naasucuaari jiyaniya canaari tama canaa cuaqueyajinijiaaja nia pohuatohuaniuhuj, canaacua nia tiuuniuria. ¿Niaateeri na niishishano pueyanojiniji naajionee paniya, canaajiniji na pohuatanura coteunu nijaniya, canaacua nia tiuuniuria cutara? Tamasa-ca cutaraari naa miiquiaa. Niaacuajaari canaa niishijiaa cutara. Puetunu tiquiyocujanaa quijiaa pueyari canaajiniji niishiyacuja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqiuonura nia naajionee, canaa patasocoriquiano, tamasa tiuuniuria canaacua. <sup>2</sup>¿Naajioneetucua casaara panishaareni? Puetunu pueyajanaari na

naata niishiniucujaja canaari seetanujua-naa Pueyaso jiyaramiquishano pueyani, nojori niishishacari taa canaa paniya jiyanhua nijaniyani. <sup>3</sup>Cristocujaaari nioojiajinia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojiajinia minianata. Seetanujuanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuanaa nioojiajiniajanaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatanuucua nijaniya.

<sup>4</sup>Naacuajitij, canaari seetanujuanaa niishiyani canaari Pueyaso jiyaramiquishanoni. Cristocujaaari naa canaa niishitiquiaa maninia. <sup>5</sup>Majaari canaa niishiriojonu canaa miiijosanoori tama canaa cumaacata canaa miishanojuaja. Maja. Canaari saaja Pueyaso cumaacata poonijioquiaani. <sup>6</sup>Na cumaacata, nojuajaari canaa jataniquiaari quiarinio na rupaa pohuataanaa canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojinuucua saaja. <sup>7</sup>Naajaa, cuno rootasano saajianeecaacua quejasanoni, cunoori jiyanhua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhananuucua, Pueyaso shacantuucaari nocua pacuriquiaa. Naacuajitij, na rosesacariuhua Israel pueyacia, na jiquicoori puera shacantuuca quiquiaaritia. Naaratej, narta Israel pueyari maja

na naata na jiquioco niquiniu quiquiaari. Na nuhuaji, cuno shacantuucaari jacaria maquesaquiariuhua. <sup>8</sup>Quiarijiani, Pueyaso Sohuanuuri poonijioquiaa pueya jiuujiajinia saniniuuja, nojori tiunuuucua canaa pohuatasanoocua. Cunoori socua shanhua shacantuuca cutara Moisés jiquicojiniji. <sup>9</sup>Moisés pohuatasano Pueyaso rootasano nojuajani, cunoori seetanujuanaa jiyanhua maninia quiquiaari. Naaratej, Moisés jiquicoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaca quiquiaari. Saniniuuja, quiarijiaari socua jiyanhua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquiaa seetanujuanaa sesa miyashijiacara nojori jiyatesaanura Pueyasora. <sup>10</sup>Pueyaso jyatenuucua Moisés tariucuaaanu na rupaa pohuata na quiniuria, Moisésri shacantuucara jataquiaari. Quiari naataja saniniuuja, Pueyasoori canaa niishitiquiaari socua jiyanhua maninia rupaa canaa pohuatanura Moisés pohuatasanojiniji. <sup>11</sup>Moisés shacantuuca maquesaquiariuhua, cunoori maja na jataniniu quiquiaari Israel pueya. Quiaritia saniniuuja, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaca pa quiniuria.

<sup>12</sup>Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. <sup>13</sup>Majaari canaa miiniu taa Moisés miiquiaaricuaani. Nojuajaari quenaaruque toqueta na jiquioco mishiquioquiaari narta Israel pueya niquiyaquiniuria na shacantuuca maquesaano. <sup>14</sup>Israel pueya jiuujiacaari juhua toqueta mishiquiosano quiquiaarijuhuaj. Cumajiuujaaca nojori

quiniuucua, majaari Israel pueya niishiniu quijia Moisés caminiujushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariuucacaa-nu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanouaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. <sup>15</sup>Quiarijiaari naajuhuj. Moisés naajioneeca jaara serojosaariquia Israel pueya niquiara, nojori niishitiajaari juhua toqueta mishiquiosano quiyajaa, maja nojori niishiniuria nojori tojishano. <sup>16</sup>Quiarijiani, pueyano jaara pa Jiyaniijiaacua tiuuri, cuno toqueeri juhua na niishitiajajiniiji jaariutiasaaquiaa, maninia na niishiniuria Pueyaso Rupaa. <sup>17</sup>Pa Jiyaniijiaari Pueyaso Sohuanujuhuanajaj. Pa Jiyaniijia Sohuanu jaara poojiajinia quiya, paari Sesaacajiniiji jaariutiasanoni, maja pa camarnu na quiniuria socua. Naajuhuj, majaari tari poojia quiniu juhua toqueta mishiquiosano. <sup>18</sup>Naacujitij, puetunu pajaniyajanaari juhua niqitiu nenecuaquiaani, pa Jiyaniijia shacantuuca pacusacari pocua. Cunoori pa sohuanu rupetoosacari nata. Naacujitij, nojuajaari pueyaracaanu pa jataniquiaa jacaria, socua shacantuuca quijiaa pa quiniuria juhua nojuaja, na Sohuanu poonijiosacari poojiajinia.

**4** <sup>1</sup>Naa pa Jiyaniijia poonijiosacari canaa jiuujiajiniatej, majaari canaa pishiniu quiquiaa canaa poonijiosacari nera. Pueyaso jiyanooniucua canaa, nojuajaari canaa jiyatequiaari na rupaa pohuatanaa canaa quiniuria. <sup>2</sup>Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhuj, canaa pohuatasacari, majaari

canaa jataniniu quiquiaa Pueyaso rupaa. Canaari seetanujuaanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. <sup>3</sup>Teyano pueyate canaa pohuatasano Jesucristojiniiji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. <sup>4</sup>Pueyaso rupaacua tiuyashijiaca nojori quishacari, nojori jiyaniijia Sesaacaari nojori jiuujia jiyatequiaa juhua cariyojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuaanaa shacantuuca quijia cutara, juhua na Que Pueyasojuhuaj. <sup>5</sup>Canaa pohuatasacari Pueyaso rupaa nijaniya, majaari tama canaajiniijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuaanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. <sup>6</sup>Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari:

“Cuhuashiqui cuaara coretaara ninishiquiji”.

Quiarijiaari naajuhuj, nojuajaari poojia cuhuataquiaajuhuj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniiji pa niishishacari. Nojuajaari seetanujuaanaa shacantuuca quijia cutara, Pueyaso Niyanu na quiniuucua.

**Paari maninia quijiaa quiniutianiyani saaja Pueyaso rupaacua pa tiuushacari**

<sup>7</sup>Cuno cumaaca canaa na jiitiaani, cunoori Pueyaso cumaaca cutara. Saniniuujia, canaa cuaqueyari cumaacaa-

ju, saaja juhua maraujiniji panishano pataco. Naacuajiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. <sup>8</sup>Naacuajitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiitiasacari. Jiyanoehua canaa tacaashacari, naajaa, majaari canaa tarinitianu quiquiaa Pueyasora poonijionu. <sup>9</sup>Canaari naquiya miishaaquiaaaniuhuj. Naajaa, majaari Pueyaso cartenu quiquiaa canaa. Naajuhuj, canaari juhua quiaquesano jiyocuara jaqueroosaaquiaaaniuhuj. Naajaa, majaari canaa cusojuasaanu quiquiaani. <sup>10</sup>Puetunu tiqiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracaani. Naacuajitij, canaa na niqitiosano cumaaca poonijosacari canaa rishiyashijaca cuaqueyajinia, pueyari niishiquiaa, Jesuuri seetanujuanaa saminio. <sup>11</sup>Mijiria canaa quishacarijia, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacuajitij, saminio na jiitiasacari canaa, Jesu cumaacaari niquishaaquiaa rishiyashijia canaa cuaqueyajinia. <sup>12</sup>Canaari juhua piriuquiuniuquiaani, canaa pohuatanuucua Pueyaso rupaa nia niqiyara. Niaari pueyaracaanu rishijiacara quiriquiano saniniuujia, canaa pohuatasanoocua nia tiuuniuucua.

<sup>13</sup>Tariucuacaanu Pueyaso Rupaaajinia, supuetana David naajiotasanoori naa sequeya:

“Pueyasoocua cua tiuuniuucua, janiyari pocuareeni”.

Canaari naajuhuj. Pueyasoocua canaa tiuuniuucua, canaari na rupaa pohuataquiaani. <sup>14</sup>Canaa jaara puecoosaariquia na rupaa canaa pohuatanuucuanu, naajaa.

Canaacuajaari niishiyani, pa Jiyaniijia Jesu Samiitianiacujaari canaa samiitianijionutaniuhujuhuj, Neyanu Jesu rupesano canaa quiniuucua. Pueyasoori canaa rijionutaniya puetunu nijaniyatajanaa, pueyaracaanu na shuriuucua pa quiniuria. <sup>15</sup>Naacuajitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucuanu, puetunu cunajuanaari niaacuara, maninia nia quiniuria Pueyasora. Naa Pueyaso jiyanooniucua nijaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jiyanoehua shuquiritiasaanutaniya, queraatia pueya na jiyanooniucua.

<sup>16</sup>Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuujia puetunu juucajanaa socua mashajashiyacujaa. <sup>17</sup>Janiyara, puetunu naquiya canaa miishacarijanaa mijiria, cunoori secaja, rupaquijijuhuj. Cuno naquiya miiniu canaa rejeretanuucua, iPueyasoori cunora jiyanoehua maninia miiniutianiya canaa! Cunora, canaari shacantuca quijiacara jatanishaanutaniyani, pueyaracaanu rishijiacaa canaa quiniuria. <sup>18</sup>Naaratej, majaari canaa jiaatianu quiquiaa canaa jiitianura mijiria canaa niqishano casaa. Canaa cutaraari Pueyaso jiitiasano niquishoo casaacua jiaatiaquiaani. Mijiria niquishano casaari saaja shaajeja casaa. Pueyaso jiitiasano pa niquishoo casaa saniniunijia, cuno cutaraari shaajeyashijia.

**5** <sup>1</sup>Mijiria pa quishacarijia, nio pa cuaqueyari saaja juhua suhuorotu quiya pa sohanura, nareja juhua rucoonaa pa quishacari mijiria. Mijiria pa jiitiasano pa shoque jaara cusoquee, paacuajaari niishiyani, paari tari jiitiaa tamonu cuaqueya jiyocuaaanu. Cuno

cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohanu quiquiora. Cunoori maja pueyano shipinishano. <sup>2</sup>Mijiria canaa quishacarijia nio canaa sohanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohanu pacusaanura jiyocuacaanu. Tii quiyacuaajaari canaa sohanuucujaji tiasano quiquio. <sup>3</sup>Canaari cuno qiarinio cuaqueya cushiyonutianiya juhua toqueni, maja juhuasu canaa sohanu quiniuria. <sup>4</sup>Nio cuaqueyajiniaja canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa qiarinio cuaqueya cushiniu paniyani, Pueyaso shipinishano canaarani. Naacujitij, nio shaajeja canaa cuaqueyari puetunu maninia jatanishaanutaniyanaa Pueyaso cumaacata, pueyaracaanu rishijia cuaqueyaraca canaa quiniuria. <sup>5</sup>Pueyasojuanaacuaajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohanu, pa niishiniuria nojuajaari seetanujuanaa naa pa miiniutianiya.

<sup>6</sup>Naa canaa niishishacaritij, majaari canaa tacaaniu quiquiaa. Canaacuaajaari niishiyani nio cuaqueyajinia canaa quishacarijia, majaari juhuanojuaja pa quiniu pa Jiyaniijia shuriucua. Naacujitij, paari tucuacaanu quiyajaani pueyaracaanu pa quijiarano quiquiojiniji. <sup>7</sup>Cunora, mijiria canaa quishacarijia, majaari canaa quiniu tama canaa niishitajatajaaja. Canaa cutaraari canaa Jiyaniijiaacua canaa tiuuniutia quiquiaani. <sup>8</sup>Naacujitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya

tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. <sup>9</sup>Naacujitij, canaa jaara nio cuaqueyajinia quiyajaa mijiriani, naajuhuj canaa jaara na cartequeni, canaari saaja pa Jiyaniijia shuquiritiniucua jiaatiaani. <sup>10</sup>Puetunu pajaniyanaacuaajaari Jesucristo taccoji na nequesoreesaqui nujatejosaariquianoni. Cuniqiu, puetunu mijiria pueya miishanojuanaari maatia niishishaanutianiya, maninia pa miishano, sesa pa miishano. Na nuhuaji, pa Jiyaniijiaari maninia miiniutianiya maninia miijiaa. Saniniujia, sesa miijiaaari taraatia miishaanutaniyacujua.

#### **Pueyasoori pueya jiyanooni panijia cutara**

<sup>11</sup>Naaratej, canaa niishishacari jiyanohua puereeta quiniutianiya pa Jiyaniijia saniitiosacari na tojtiaashijiaa, canaari cunora saniniujuquiaa pueya tojtitiniuria Pueyaso Rupaani. Pueyasocuaajaari niishiyia canaari seetanujuanaa nera poonijionaani. iSeetanujuanaa naa nia niishitiriquiajaaniuhuj! <sup>12</sup>Majaari nia jyaniniu canaari tama canaajiniijiaaja nia pohuatanu coteerohuanihuahua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacujitij nia naata cuno pueya tacunu canaacuaaji, cuno pojori canapue te sapuenu juhua maninia quijiaa niquishano pueya najuhuanacuajani. Majaari nojori niishiniu tacaaniu taamueca jiuujiaracateja nojorini. <sup>13</sup>Noojiaqueya nijaniyajinijinio naasucuaari jiyaniya canaari juhua paateca puaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniujia, canaa jaara maninia niishiriojojuaca quiriquiani,



canaari naa quiya niaarani, maninia canaa niishitiojonura nijaniya. <sup>14</sup>Cristo paniniuucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canaacuajaari niishiyani, nojuajaari puetunu pueyacuarajanaa cusoquiaari. Naa na cusonuucua puetunu pueya nitijianaatej, Pueyasora, puetunu pueyajanaari tari cusunuuquiaari Cristota. Naacuajitij, Pueyasoori na naata jiyanooni puetunu Neyanuucua tiuuniaajanaa. <sup>15</sup>Cristocuajaari puetunu pueyacuarajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaarihuajuhua. Naaratej, paa cuara miiria saa na panishanojua. Majaari socua pa miiniu tama pa panishanojuaja. <sup>16</sup>Tarijia, canaari saaja canaa panishano pueyacua taraajejani. Quiarijia saniniuuja, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyanjiani nojuaja naasucuaari nareja pueyano, juhua pajaniyajuhua. Quiarijia cutara, majaari naa canaa niishiriojonu nojuajiniji. <sup>17</sup>Naajuhua, cante Cristo rupuesanoni, nojuajaari quiariniora jatanishano pueyano. Tariucuacaanu sesa na quiniuuri tari jatasanocua. Saniniuuja, puetunjuanaari quiarinio quiya.

<sup>18</sup>Puetunu cunujuanaari Pueyaso miishano. Nojuajaari Neyanu Cristo cusojuaquiaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiquiaari puetunu pueyajanaa canaa pohuatanura, nojori jiyanooshaanurajuhua. <sup>19</sup>Naacuajitij, Pueyasoori mijiria quiniaa jiyanooquiaa saaja Neyanu Cristooocua nojori tiushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihua socua. Nojuajaa-

ri canaa jiyatequiaari na rupaa pohuataanaa canaa quiniuria, pueya canaa tiutiniuria Neyanu Jesucristooocua, jiyanooshano nojori quiniurajuhua. <sup>20</sup>Naacuajitij, canaari Jesucristo jiyaramiquishanoni, canaa caminiujiuniora niaara na sequesano canaa. Naa canaa caminiujiushacari Jesucristo rupaatej, Pueyasajuanaari nia masuya na muerasunia quiniuria, Neyanuucua nia tiuushacari. Naacuajitij, canaari Cristo niti nia secojiyani, itama nia cuaqueyajaaja nia jiyanootiri Pueyaso! <sup>21</sup>Pa Jiyaniijiarano Jesucristoni, nojuajaari tojetaarucujanaa sesa miyashijiajuhuanajaj. Naajaa, na Que Pueyasoori nocua tiutiaquiaari puetunu sesa pa miishanojuanaa, pa niti na saniitiosocoriquiano. Naacuajitij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

**6** <sup>1</sup>Naa Pueyasora poonijionaa canaa quiniuucuatej, canaari jiyanhua nia secojiyani cuarta Pueyaso muerasunaa, saa Pueyasoraja nia quiri, nia jiyanoojia na quiniuucua. Maninia na muerasunia quiri. <sup>2</sup>Tariucuacaanu na sequesano cuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacari cua, janiyari quia naacuanujuhua”.

Cua panishano pueyanaa, quiarijaari Pueyaso jiyanooshacari pueya. Nojuajaari quiarija pueya jiyatequiaa na muerasunia nojori quiniuria.

<sup>3</sup>Cunora, canaari tama canaa cuaqueyajaaja cojuaquiaani, maja canaa miiniuria sesa tamasa niquiara. Canaari naa maninia miiquiaani, nojori mariqui Jesucristooocua tiyquiriri, nojori mariqui Pueyasora canaa poonijosano sesacarejaarihuaj. <sup>4</sup>Canaa cutaraari saaja maninia miiquiaa pueya niquiarani,

puetunu pueya niishiniurijanaa canaari seetanujuanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiitiaaquishacarijuhuaj. Naajuhuj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani.

<sup>5</sup>Naajuhuj, canaari juhuajaniya rejeretaquiaa canaa jaara majacujusaaquiaani, canaa jaara nujatejojuajinia nujatejosaaquiaaaniuhuj. Nasojosano pueya jaara miitianu paniquiaa canaani, canaari na rejeretaquiaajuhuj, pueya tiuuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jiyanhua poonijioquiaa nerani. Canaari sequeyarucua sutequiaani. Canaari miaajequiaajuhuj.

<sup>6</sup>Naajuhuj, pueyari na naata niishiniu canaari seetanujuanaa Pueyaso seyani, sesa miyashijiaca canaa quiniucua, maninia canaa niishiniuucua Pueyaso rupaajuhuj. Niishishaatiacuajaari, canaari Pueyaso seyani, jacaria pocujaca canaa quishacari juaajiaca pueyata, naajuhuj, maninia canaa miishacari puetunu pueyajanaanio. Naa niishishaatiajariuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhuj. <sup>7</sup>Niishishaatiajariuhua canaari Pueyaso seyani seetanu rupaajanaa canaa pohuatanuucua pueya, naajuhuj, casaa canaa miiniucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniucua. Pueyaso rupaata, canaa cutaraari saaja Sesaaca jiyatequiaa canaacuajini. <sup>8</sup>Naa Pueyasora canaa poonijiosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuujia. Naajuhuj, noojiaqueya pueyari maninia pohuata-

nuquiaa tamasaca niquiara canaajiniji. Tamasacaari canaa sesacaquiaa saniniuujia. Noojiaqueya pueyari canaa sequequiaa sapojonuujacatani. Tamasacaari saniniuujia maninia tojtiaquiaa canaa, seetanu rupaajanaa canaa pohuatasacari. <sup>9</sup>Noojiaqueya pueyari canaa niquiquiaa juhua najuhuaa quijiaca pueyani. Tamasacara saniniuujia, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari jiyanhua miitiasaaquiaani. Naajaa, majaari canaa puecoosaanu quiquiaani. <sup>10</sup>Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniucua. Canaari seetanujuanaa casamijiuniucuaajuhuj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamijiuniucua niqishanoni. Naajaa, canaari puetunu canaa panishanojuanaa jiitiaacuajani.

<sup>11</sup>Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. <sup>12</sup>Majaari canaa tarinitianu canaa paniniu jiyanhua niajaniya. Niajaniya sajaraj, majaari nia paniniu canaa, taa canaa paniya niajaniyacuaani. <sup>13</sup>Janiyari nia nenecojiyani, naatej, taa pueyano nenecojoquiaa necohuacuaani, imajaari canaacuaji nia taacanunu! Seetanujuanaa canaa nia paniri, taa canaa paniquiaa niajaniyacuaani, seetanujuanaa panitioojuaca pa quiniuria.

#### **Paari Pueyaso quiquioni**

<sup>14</sup>Saniniuujia, maja Pueyaso tojiyashijiaca pueya nia paniniu, nojori nia cojiniuria. Naajuhuj, maja cutaraari nia

caminiu Pueyaso tojiyashijiata, niaa mariqui rimiajata quijiaca quiriiri. ¿Maninia miijiatucua shuquiriaatia quiija quiriquia, sesa miijiata na quishacari? Maja. Cua riuquareto pueyanaa. ¿Cuhua-shiqui quijiateeri na naata juhuajaniya jatiqui quiniu ninishiqui quijiata? Maja na naata. <sup>15</sup>Seetanujanaa pueyanaa, Cristoori maja Sesaaca rupeua. Naajuhuj, Pueyasocua tiuujia pueyanoori maja na naata maninia rupuetoonu Pueyasocua tiuyashijia pueyana. <sup>16</sup>Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitanu-  
ra tiini? ¡Maja! Paacuaajaari pueyaracaanu Quiija Pueyaso quiquioni. Na pueyara na sequesancuaajaari naa naajiotasano quiya:

“Janiyari nojorijinia quiriquianoni. Janiyari nojori tajinia rucanejotunaniyani. Janiyari nojori Jiyaniijajanaa quiniutianiyani. Nojoriiri cua pueya quiniutianiyacujua”.

<sup>17</sup>Cunora, pa Jiyaniijaari na pueya sequeya:

“¡Cua tojitiaashijia pueya tajiniji nia pacure! Nia shiriquire tamocora nojoriicua. Majaari sesa casaa nia saniniu paniniu. Naa jaara cua tojiijia quiri, janiyari nia jiyatenutaniya quirianoni. <sup>18</sup>Janiyari nia Que quiniutianiyani. Naacuajitij, niaari cua niquiohua quiniutianiya. Naa sequeyanijia, puetunu cumaacaracajanaa cua quiniuucua”.

**7** <sup>1</sup>Naacuajiti canaa panishano pueyanaa, paacuaajaari naa seetanujanaa pa Jiyaniijia sequesano pajaniyarano jiitiaani. Naaratej, pueyara-caanu tama pa cuaqueyajaaja juhua jeequesano pa jiitariquia, poojiajuhuaj. Majaari pa shanacunu juhua curuushojo-

sano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijia pa quiniuria, saa neraja pa quiniuriajuhuaj.

**Corinto pueya tacatosacari nojori jiuujia, maninia nojori quiniuhua**

<sup>2</sup>Pueyanaa, ¿taa nia miiquianuni? ¡Canaa panijia nia quirihoa! Majaari canaa miiniu quiquianu sesa nijaniya. Majaari quenaaja niquiriyatu nijaniyajinijinio canaa sesonu quiquianu canaa niishitiojosanota. Majaari canaa sapojonu quiija nijaniya. <sup>3</sup>Naa cua sequesacari nijaniyatej, majaari cua sequenu cua cararonura nijaniya. Janiyacuajaari tari nia sequereeni, canaari jiyanohua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua nijaniyani, seetanujanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyaracaanu jatiqui quiijaca quiniutianiya Pueyasotani. <sup>4</sup>Janiyari seetanujanaa naa nia sequeyani cua panishacari nijaniya. Quiarijiani, janiyari jiyanohua nia timitiaani, maninia cua tojinuucua nijaniyajiniji. Canaari seetanujanaa naquiya miiquiaani. Naajaa, maninia canaa tojinuushacari nijaniyajiniji, cunoori cua cumanijacanu. Cunora, janiyari jiyanohua nia shuquiritiaani.

<sup>5</sup>Canaa jaara tiuquiquianu nia Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanjanaani. Pueyasocua tiuyashijiaacari canaa juaariquiaa. Canaa jiuujiaari niaacua tacaariquiaa saniniuujia. <sup>6</sup>Jiyacaritij, Pueyasoori canaa cumanijacanu Tito tiuquishacariuhua canaacua. ¡Pa Pueyasocuaajaari tacaajiaa cumanijana! <sup>7</sup>Canaa jiuujia canaa cajitishacarini, cunoori maja saaja canaa

niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jyanohua na timiniutia. Nojuajaari canaa pohuatacanu, niaanaari canaa niqiniuucua jiaatiaa. Niaanaari cucua taraajeya, jyanohua nia taraajete-nuucua janiya. Niaanaari cucua tacaya jyanohua, cua rootasano tojjijia nia quiniuria quiarjia cutara. Naa cua tojishacari niaacuajitij, janiyari jyanohua shuquiriquianuni.

<sup>8</sup>Niaacuara cua naajioneeri nia taraajete-canu. Janiyari taraajecanujuhuj, naa cua taraajetenuucua nijaniyatej. Quiarjia cutaraari maja cua taraajenu. Cua naajioneecuajaari saaja rupaquijia nia taraajocanu. <sup>9</sup>Quiarjiani, ishuquiriaatia quiyanijia! Majaari nia jyaniniu janiyari shuquiriaatia quiyani naa cua taraajonuucua nijaniyatej. Shuquiriaatia quiya cutaranijia, cua niishishacari, naa cua taraajonuucua nijaniyatej, niaari nioojia tacatorhuacuaa Pueyasocua, Pueyaso tojtiajaca nia quiniuhua. Naacuajitij, janiyari quiarjia niishiyani, majaquiiri cua sesonu quiquianu nijaniya, naa cua taraajonuucua nijaniyatej. Pueyasocuaquiiri maninia poonijioriquiaa nioojiacajinia, naa nia taraajesacaritij. <sup>10</sup>Pueyasojuaana jaara pa taraajetere, cunoori maninia, poojia pa tacatonuhuaa nocua, na jyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. <sup>11</sup>Nia taraajesacari cua nacasusacari nijaniya cua naajioneejiniani, cunoori seetanujuaana Pueyaso taraajetesano quiquianu nijaniya. Naa nia taraajenuucuatej, nia niquishuriiraj, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano

sesa. Niaacuajaari maninia miiquianu nia juaashacari cuno sesa miijia. Niaari na naaqui puerecanujuhuj, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano nijaniya. Naacuajitij, niaari ritia cuno sesa miijia taanuucanu nia tajiniji, maja socua nia rupesano na quiniuria. Naa nia miiniuucua puetunu maniniajanaatej, janiyari quiarjia niishiyani, majaquiiri nia maniniucuanu quiquianu naa sacuaraatia cuno pueyano miishanotej. <sup>12</sup>Pueyanaa, niaari maninia canaa tojjijia. Seetanujuaana, cua naajiosacari niaacuara, majaari cua naajionu quiquianu saaja cuno sesa miijia pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niqiuara: niaacuajaari seetanujuaana canaa panijiaa quiyaja, nia tojishacari canaa. <sup>13</sup>Naaratej, canaari canaa jiuujia cajitiquianuni, canaa tojishacari Tito pohuatasano nijaniyajiniji.

Majaari saaja Tito pohuatasano cumanijianu quiquianu canaa. Canaari Tito timitiacanujuhuj, canaa niquishacari nojuajaari shuquiriaatia tiuquiriohua canaacua. Puetunu nijaniyajanaari na naacucanu, noojia na cajitiniuhua, najuhua na tacaaniuucua niaacuajuhuj. <sup>14</sup>Tito quiaaquishacarijia niaacua, janiyacuaajaari juhuacarijia na pohuatacanu nijaniyajinijini, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu nijaniyajiniji. Puetunu cua pohuatasanojuaana Tito nijaniyajiniji seetanujuaana quiquianu Titara. Naajuhuj, puetunu cua pohuatasano nijaniyajanaari pueyaracaanu seetanu rupaajanaa quijia. <sup>15</sup>Quiarjia Tito niishiriojosacari nijaniya, nojuajaari

socua jiyanhua nia panijia quiya, nia tojiniucua maninia nojuaja. Niaacuajaa-ri tetecatucanu nia puerenuta na tiuquishacari niaacua. Majaari na rerequetenu quiquianu nojuaja. <sup>16</sup>Janiya-juhuaj, jiyanhua shuquiriaatia quiyanijia, cua niishishacari quiarjia cutara cua naata niaacua tiuuniu seetanujanaa.

### Capora pa quiriquiaj

**8** <sup>1</sup>Quiarjiani pueyanaa, canaari nia pohuatanu paniyani, taa Pueyaso cumaquiya jiyanhua na muerasu maapue niya Macedonia jiyajiniani. <sup>2</sup>Nojoriiri jiyanhua taraatia miiquioquiaa. Naajaa, nojoriiri saaja jiyanhua shuquiriaatia quiya. Naajuhuj, casamii-jiuniucua nojori quishacari, naajaa, nojoriiri caporatujiuri. Nojoriiri na cumaneecajiniji nareja niqutiojoquiaa queraatia, Judea jiyajinia casamiijiuniucua Pueyaso pueyara. Nojori niqutiojosanoori juhua casamiriaca pueya niqutiojosano. <sup>3</sup>Seetanujanaa narta Pueyaso pueyacu nojori taraajenu-  
ta, nojoriiri naa na cumaneecajiniji niqutiojocanu queraatia. Nojoriiri puetunu na jiiitasano cumaneecajanaa niqutiojonuucanu. Naacuajitij, janiyari jiyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, inojoriiri socua niqutiojocanu! Seetanujanaari cua sequesano nijaniya. Janiyacuajaari nojori miishano niquiniani. <sup>4</sup>Niya Macedonia jiyajinia quiniaa parta Pueyaso pueyani, nojoriiri nijaniyajiniji tojiquianu. Nianaari cumaneeca reratenu paniriquiaacuaa, nia jiyarosocriquiiano Judea jiyajinia quiniaa casamiijiuniucua parta Pueyaso pueyara. Naaratej, nojoriiri jiyanhua canaa nenecojocanu canaa masenura nojori niqutiojonu panishano cumaneecajuhuj,

parta Pueyaso muerasura. <sup>5</sup>Seetanujanaa Pueyaso tojijiaa nojori quiniucua, nojoriiri maja saaja na cumaneeca na niqutiojonu quiquianu. Nojoriiri coteenu tama nojori cuaqueyajaaja jiyatecanu seetanujanaa nojori quiniuria saaja pa Jiyaniijia, taa Pueyaso paniya pa miiniuriacuajani. Naajuhuj, nojoriiri tama na cuaqueyajaaja jiyatecanu canaa tojijiaa nojori quiniuriajuhuaj. Cunora, canaari nojoriicuaaji juujiatecanuni. <sup>6</sup>Naa capora niqutiojonaa nojori quiniucuatej, canaari Tito sequerucuaani, niaacua na quianuhuaa quiarjia. Nojuacuajaari tarjia naacucanu nijaniya, nia reratenu-  
ra nia niqutiojonu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucatanura reratenu puetunu nia niqutiojonu panishano cumaneecajanaa. <sup>7</sup>Nijaniya, Corinto tiacajinia quiniaanaa, niaacuajaari jiyanhua maninia Pueyaso muerasu. Niaari Pueyasoocua tiuujiaa jiyanhua. Naajuhuj, niaari jiyanhua maninia Pueyaso rupaa niishitiojonuujuaca. Niaari Pueyaso niishitija jiiitaajuhuj. Niaari mariyata shitimia poonijionuujuaca, tamasaca nia naacunura. Naajuhuj, niaari canaa panijiaa jiyanhua. Naatej, taa maninia miijiacatucuaa nijaniyani, capora nia quirijuhuj, nia cumaneeca nia niqutiojonura nareja parta Pueyaso pueyara.

<sup>8</sup>Majaari juhua nia jiyaniijia cua sequenu nijaniya, nia cumaneeca cua niqutiojotenura nijaniya. Janiyari nareja nia pohuatariquiaa capora Macedonia pueyajinijini, tama nia niishiniuriajaaja, niaate seetanujanaa canaa panijiacajuhuj, taa Macedonia jiyajinijinio pueya paniya canaacuaani. <sup>9</sup>Niaacuajaari pa Jiyaniijia Jesucristojiniji niishiya; na Que Pueyaso shuriucua na quishacarijia, nojuajaari puetunu

maninia casaajanaa jiitiaja quiquiaari. Naajaa, nojuajaari juhua casamiijiuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuuja jiyanhua shuquiriaatia quijia na jiyatunara pajaniya, juhua jiyanhua queraatia casamiriaca pueya pa quiniuria. Naa jaara seetanujanaa panijia quiriquia, naa nia miirijihuhuj, taa pa Jiyaniija miiquiaaricuaani.

<sup>10</sup>Janiyari niishiriojoriqiaani, taate socua maninia nia naata miiniu parta casamiijiuniucua Pueyaso pueyarani, shuquiriaatia nia quiniuriahuhuj. Cua tojiri. Naaacujaari niishiya, noo marijia-ra pa shococanutej, niaacujaari juhuacatecara cumaneeca reratejonu coteecanu. Naaari naa maninia miiquianu tama nia tacaashacarijiaaja niarta Pueyaso pueyacua. <sup>11</sup>Naaari shitimia juhuacatecara nia cumaneeca niqutiojonu coteecanucua. Naaratej, quiarijia nia sequeyanijia, niaa cuara naa shitimia niqutiojonu tuucataara puetunu nia niqutionu panishano cumaneecajanaa. Naa jiitiasano cumaneecajiniji nia niqutiojore, taa cumaneeca nia niqutionu paniyacuajani. <sup>12</sup>Naa tojiri. Paa jaara seetanujanaa nareja niqutionu paniriquia pa cumaneecajinijini, Pueyasoori pa niqutiosano shuquiritiaja, paa jaara juhua capora niqutiojore pa jiitiasanojinijini. Maja cutaraari Pueyaso paniniu pa niqutionura, pa jaara nia jiitiaquiyani.

<sup>13</sup>Majaari Pueyaso paniniu cutara puera nia niqutiojonura nia cumaneeca, tamasaca quiniuria casamiriaca, saniniuuja nia jiitaaquiniuria nia panishano. <sup>14</sup>Maninia cutaraari puetunu Pueyaso muerasujanaa jiitianura na panishano. Naaratej, quiarijiani, niaa cuara niqutiojora nia jiitiasanojiniji, nojori jiitianura na panishanojuhuj. Tamacari saniniuuja, nojoriiri saniniuu-

jia nia jiitaaquishoo casaa nia niqutionutaniyacujua, niaa jaara nia jiitaaquiri. Naacuajitij, puetunu Pueyaso muerasujanaari na panishano jiitianutaniya mariyata, maja rimiajata.

<sup>15</sup>Naajuhuj, tariucuaaanu Pueyaso Rupaajiniani, jiyocuaaanuji Pueyaso tinishano Israel pueya miaquesocoriqiaano panjinijiri nia naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuj, cante secaja reratequiaarini, majaari nojoriria na puetanu quiquiaari”.

Naaratej, Pueyasooa tiuujiaca nia quiri. Naa jiitiasanojiniji nia niqutiojore nareja, nia jamueyaquiniutia.

#### **Pablo pohuatasano Titojiniji, Tito cojiniaajinijinio**

<sup>16</sup>Titoori jiyanhua niaacua jiaatiaja, taa cua jiaatiaa niaacuacuaani. Pueyasocuaajari na jiyatequiaari nia panijia na quiniuria. Janiyari cunora Pueyaso sequequiaani: “iPaacarasho Pueyasonaa!” <sup>17</sup>Naacuajitij, janiya jaara Tito sequerucuaani nia niquiniucua na quianura, nojuajaari cua timitiriucua. Tama nojuajaari nia niquiniucua jiaatiaa. Naacuajitij, nojuajaari quiarijia quianutaniya niaacua.

<sup>18</sup>Canaari tamonu parta Pueyaso pueyano jiyaroya Titotani, na tarajariquiaano. Cuno pueyanoori puetunu Pueyaso muerasu maapuejanaa shuquiritasano pueyano, maninia na pohuatanuucua pa Jiyaniija Jesucristojiniji. <sup>19</sup>Macedonia jiyajinia quinaa Pueyaso muerasu maapueeri tari na saquirojocanu na tarajanura canaa, pa niqutiojosano cumaneeca canaa jiyatanura nata, Judea jiyajinara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniija timitianutaniya socua. Naajuhuj, parta Pueyaso pueya Judiocuaari niishiniutianiya,

narta Pueyaso pueya taucuacaquiiri nojoriicua taraajejacajuhuj. <sup>20</sup>Maninia-cuajaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniniu quiniutianiya canaari nio queraatia canaa reratesocoriquiano cumaneecajiniji nohuasenuitianiya. <sup>21</sup>Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara.

<sup>22</sup>Quiarijiani, niaacua canaa jiyarosocoriquiano pueyata, canaari niqiijinio tamonu parta Pueyaso pueyano jiyaronutianiya. Pueyaracaanu na poonijosacari pa Jiyaniijia, janiyajanaari na niquiquianuni. Nojuajaari seetanujuanaa pueya panijia, Pueyaso panijia na quiniuucua-cuaa. Quiarijia cutara, seetanujuanaa niaacua na tiuushacari, janiyari niishiyani, nojuajaari jiyanohua maninia Pueyaso pueyano. <sup>23</sup>Tamonu jaara nia nequesotare cante Titoni, niocua na riucare: “Nojuacuajaari Pablota poonijiona, na cumaquiniuria pajaniya”. Naajuhuj, Tito cojiniaari niqiiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maniniuhua-queetasano, maninia na tojtiajaca nojori quiniuucua. <sup>24</sup>Naaratej, nio pojori jaara niaacua tiuquiijiose, niocua puetunujua-naa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujuanaa panijia. Naajuhuj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pahuatasacari nojori niajaniyajiniji.

**Pablo shiniujiushacari pueya, cumaneeca nojori reratenura narta Pueyaso pueyara**

**9** <sup>1</sup>Janiyaruhua najuhua niaacuara naajiyani, cua sequenura niajaniya, nia cumaneecata nia naacunura Judea

jiyajinia quiniaa parta Pueyaso pueya. <sup>2</sup>Janiyacujaari niishiyani, niaari tarijia na naacunu paniquianucua. Cua shuquiritiasacari cunora niajaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pahuataquiaa niajaniyajinijini. Janiyacuajaari nojori pahuataquiaani, niajaniya Acaya jiyajinia quiniaa pueyani, niaari nia cumaneeca niqitionu paniquianu noo marijara pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niqitionu paniyajuhuj, naa nojori cua pahuatunuucua niajaniyajinijitij. <sup>3</sup>Janiyari niaacua tiuya seetanujuanaani, niaacuajaari canaacuaji tariucua reratesano jitianutianiya nia cumaneeca, taa cua pahuataquiaa niya niajaniyajinijicujani. Naajaa, janiyari nio parta Pueyaso pueya jiyaronutianiya niaacuani, seetanujuanaa juhuacarijia nia reratenura nia niqitiojosocoriquiano cumaneeca. Majaari cua paniniu cutara cua pahuatasano niajaniyajiniji cuaracashitishaanura. <sup>4</sup>Macedonia jiyajinijinio parta Pueyaso pueya naasucuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririqiniutianiya. Niaari caririqiniutianiyajuhuj. <sup>5</sup>Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niqitiojonu panishano cumaneeca cuara tari reratesano quiiria canaacuaji. Naacuajitij, nia niqitiojosano cumaneecaari seetanujuanaa nareja nia niqitionu panishano quiniutianiya, maja canaa niqitiojotesano niajaniya.

<sup>6</sup>Pueyanaa, nio sequesano nia niishiri-quia. Naa sequeyari: “Cante secaja natajani, secaja senoonutaniyaajariuhuj. Saniniuujia, cante queraatia natajani,

queraatia senoonutaniyajaarihuaj”. Naajuhuj, paa jaara capora quiriquiani, Pueyasoori saniniuujia socua queraatia pa niqutionutaniya pa niquticosanojiniji. <sup>7</sup>Naaratej, puetunu nijaniyajanaa cuara niquitioora taa nioojiajinia nia niishiriojoree nia niqutiononuracuajani. Majaari nia cumaneeca nia niqutiononu nia jamuenuta, nocua nia taraajenutano. Naajuhuj, majaari nia niqutionu nia cumaneeca saaja tamasaca shiniujiushacari nijaniya. Pueyaso cutaraari shuquiriaatia niqutionuaca timitiaja. <sup>8</sup>Pueyasocuaajari cumaacaraca na niqutionura nijaniya puetunu nia panishanojuanaa nia jiitiasocoriquiano pueyaracaanu. Naacuajitij, niaari pueyaracaanu socua queraatia jiitiajaca quiniutianiya, tamasaca nia niqutiononurajuhuj, nojori jaara jiitaaquiriquia nojori panishano. <sup>9</sup>Niaa jaara naa capora quiriquiatej, niaari nio tariucuacaanu Pueyaso Rupaa naajiotasano tohuateenutaniya. Naa sequeyari:

“Maninia pueyanoori juhua capora nareja niqutionojua na casamijiniji casamijiuniucua pueya. Na miishanoori pueyaracaanu maninia quiniutianiya Pueyasora. Majaari Pueyaso niyajetanu quiniutianiya”.

<sup>10</sup>Pueyano natasacari casaa jajau na cuhuariquiajinia, Pueyasoori na canijiaquiaa. Naacuajitij, na camaruuri socua jiitianutaniya tamacari na natasocoriquianohua, na miaquesocoriquianonio. Naajuhuj, juhua capora nia niqutionosacari nia jiitiasanojiniji, niaari juhua nia cuhuariquiajinia nataa. Naacuajitij, Pueyasoori nia jiyatenutaniya socua queraatia jiitiajaca nia quiniuria, pueyaracaanu maninia nia miiniuria tamasacarajuhuj. <sup>11</sup>Naa capora nia quiniucua nia casaatatej, Pueyasoori juhua capora nia niqutiononutaniya puetunu na jiitiasanojinijianaa,

queraatia nia jiitianura, tamasaca nia niqutiononura pueyaracaanu. Naacuajitij, canaa jaara nia niqutionosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniucua, nojoriiri Pueyaso sequenutaniya, “paacarasho”. <sup>12</sup>Naacuajitij, nojori jaara masere nojoririano nia jiyarosano cumaneeca, majaari saaja nojori jiitanu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”. <sup>13</sup>Nojori jiitiasacari puetunu nojori panishanojuanaa, nojoriiri Pueyaso maniniuuhuaqueetanutaniya jiyanoohua. Nojoriiri naa maniniuuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojtiajajuhuj, naajaa, taucuaca nia quishacari nojoriiri. Nojoriiri Pueyaso maniniuuhuaqueetanutaniyajuhuj jiyanoohua capora nia quiniucua nojoriiri, tamasacaranio. <sup>14</sup>Nojoriiri Pueyaso secojonutaniya niaacuarajuhuj, jiyanoohua nojori paniniutia nijaniya, Pueyaso jiyatenuucua nijaniya nojori panijaca nia quiniuria. <sup>15</sup>Naajuhuj, janiyari jiyanoohua Pueyaso sequeyani, “paacasho”, jiyanoohua maninia na miiniucua nijaniya, Neyanu Jesucristo jataniniucua nioojia.

**Pablo cuara tojishaaria, Jesucristo jiyatenuucua nojuaja na rupaa pohuatanara**

**10** <sup>1</sup>Janiyacuajaari Pablóni. Quenaa-ja cua tojitiare. Cua Jiyaniija Cristoori jiyanoojia quiquiaricuaa, jacaria pocuajajuhuj. Janiyari naa quiniu panijajuhuj. Naaratej, janiyari quiarijia nia nenecojiyani, cua tojitiare quenaaja. Tamascanaari cua pocuaquiaa, janiyanaari jacaria pocuaja



quiquiaa juhua puerejani, nia tajinia cua quishacari. Saniniuujia, tucuaaanu cua quishacari, janiyanaari jiyanoehua nia nacasuquiaa cua naajioneerjiniani, juhua nia pueresano jiyaniijia. <sup>2</sup>¿Seetanutejanaa, janiyate naani? Janiya jaara naa quiya niaarani, naajaa. Quiarijia tucuaaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyanoehua, sacuaraatia cucuara rimiaaquenuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaraatia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niquiara. <sup>3</sup>Seetanujuanaacuaaquinatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetojoquiaacuani. <sup>4</sup>Mijiria quiniaa pueyari miaquetojoquiaa cutara tama nojori shipinishano casaatajaaja. Canaa miaquetojotaja saniniuujia, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu. <sup>5</sup>Pueyaso cumaacata, canaari mijiria niishijiaa niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhuana pueya niishiriojosano jataniquiaani, Cristo tojjijiaa nojori quiniuriajuhuaj. <sup>6</sup>Canaacuajaari Pueyaso jeenucuasano pueyani, canaa nacasunura puetunu tojiyashijiajanaa. Naacuajitij, niaa jaara puetunu Pueyasojiniji canaa niishitiojosanojuanaa tojtiajacara quiriohua, na nuhuaji cutara canaa naata puetunu cureeno tojiyashijiajanaa saniitionu.

<sup>7</sup>Niaari tama cushitiiquiaajaacujua nia tiuushacari cuno sapojonuujuaa

pohuatasanoocua. Nojoriiri sapuenu juhua Jesucristo jiyaramiquishano niquishiya najuhuanaj. Maninia nia niishiriojore pueyanaa, niajaniya cante sapojosaacanucujani. Niaa jaara niishiriniaari seetanujuanaa Cristo saquiriojosano pueya, naacuajitij, niajaniya cuara niishiiria canaari Cristo saquiriojosano pueyajanihuaj. <sup>8</sup>Niaa jaara jiyaniya janiyari juhua pueya shocotaja nia sequeyani: “Canaari nia jiitianaani”, naajaa, majaari cua caririquiniu naa cua sequesacari niajaniyatej. Pa Jiyaniijia Cristojuanaacuajaari canaa jiyatequiaari nia jiitianaa canaa quiniuria. Canaari nia jiyatesaaquiaarini, canaa cumaquiniuria niajaniya na rupaata, seetanujuanaa Cristo pueya nia quiniuria. Majaari canaa jiitianu najuhua na cumaaca, canaa sesonura niajaniya. <sup>9</sup>Naa cua naajiosacari niaacuaratej, majaari nia jiyaniyu janiyari nia piriyojiyani nia puerenura janiya. <sup>10</sup>Tamasaca niajanijajiniyo pueyanaari cua sequequiaajuhuj: “Pabloori puera jiyanoehua pa nacasuquiaa na naajioneerjinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhuj, na pohuatasacari pa niquiara, na pohuatasanoori maja shanohua tojishano”. <sup>11</sup>¿Seetanutejanaa? Cante naa pocuaquiaani, nojuaja cuara niishiiria quiarijia, taa canaa naajiocanu niaacuarcuaja tucuaaanu canaa quishacarijiani, canaari naa miiniutianiyan niaacua canaa tiuquishacari.

<sup>12</sup>Cuniqui niaata quiyajaariuhua tamasaaca pueya, canapuate nia sequequiaacuajani, nojoriniaari socua maninia Pueyaso rupaa pohuatanaa tamasaacajiniji, canaajiniijiihuaj. ¿Nojoritiiri seetanujuanaa socua maninia Pueyaso rupaa pohuatanaa canaajiniiji? Johuaj. Naajaa. Majaari canaa tacaaniu quiquiaa juhua nojori canaa quiniuria.

Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuatanaa. Nojoriiri naa quijiacatej, nojori jiyanihacari nojori cutaraari socua tojishano pueya tamasacajiniji. Naa nojori miishacaritij, nojori cutaraari seetanujuanaa mosanucua. <sup>13</sup>Canaa cutara, majaari tamasaca poonijiosano canaa jiyatenu quiquiaa juhua canaa poonijiosano Pueyasora. Canaa cutaraari saaja canaa miishano shuquiritiaquiaani, tee Pueyaso jiyaroquiaari canaacuajani. Nojuacuajaa-ri canaa jiyaramiquiquiaari niaacua Corinto tiacajinia, nia niquiara canaa pohuatanura na rupaa. Naacuajitij, niari na muerasura quiquiaari. <sup>14</sup>Majaari najuhua canaa timitianu niajaniya, Pueyaso muerasu nia quiniuucua. Niaacuajaari Pueyaso muerasura quiquiaari canaa pohuatanuucua nia niquiara seetanu rupajaanaa Jesucristojiniji. Canaa cutaraari seetanujuanaa Pueyaso rupaa pohuatanu coteetanaa nia niquiarani. <sup>15</sup>Majaari canaa shuqiritianu najuhua niajaniya. Canaa cutaraari nia tiutuquiaari Jesucristoocuan, niaacua Pueyaso jiyaronuucua canaa. Naajaa, canaari socua nia pohuatanu paniya Pueyaso rupaani, seetanujuanaa Jesucristo rupaacua tiuujiaca nia quiniuria. Naacuajitij, niaa jaara seetanujuanaa Pueyaso rupaa tojijiacca quiri, niari saniniuujia na naata canaa cumaquiniu. <sup>16</sup>Niocua canaa cumaquiri canaa quianura tamaqui, tee Jesucristojiniji pohuatasoojua quiyacuajani, tii canaa pohuatanura nojuajinijijuhua. Majaari canaa quiniu paniniu pootia tamasaca poonijiosaqui, taa cuno rimiaacoori quiquioya shuquiriaatia canaa poonijiosaquicuaani. ¿Nojori shuqiritiasanoteeri tama nojori poonijiosanojuaja? Maja. Niaacuajaari Pueyaso muerasura quiquiaari canaa nia tojtianuucua.

<sup>17</sup>Pueyanaa, nio tariucuacaanu naajiotasanoori niara, nia niishishocori-quiano. Naa sequeyari: “Cante shuquiriaatia quijia quiniu paniyani, nojuaja cuaara pa Jiyaniijia shuquiritiaara cutara”. <sup>18</sup>¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuqiritiasano cutaraari noo pueyano, cana pa Jiyaniijijanaa sequenutaniyacujani: “Quiaa cutaraari maninia cua pueyanoniyojua”.

#### Pablo pohuatasano na paraajiniji

**11** <sup>1</sup>Pueyanaa, cua tojtitori nareja. Juhua paateca tama cua cuaqueyajinijijiaaja nia pohuatanu paniyanijia. Naajaa, quenaaja nia rejeretare janiya. <sup>2</sup>Janiyar jiyanhua nia tacaatiaquiaani, saaja Jesucristora nia quiniuria. Niaacuajaari niishiyaa, naatej, taa pueyano cojuaacuaa neyatuniyojua canuucujajini, saaja na camiriquiano pueyanora na quiniuria, naajuhua, janiyari nia cojuanu paniyani sesosoo nia quiniuria nia Jiyaniijia. Cristocujaaari juhua nia niyacarano. Nia jiitiana cua quishacari, janiyari juhua nia queni. <sup>3</sup>Tariija, niaacuajaari saaja Cristo tojtijiacca quiquiaari, na panijiacca nia quishacari. Quiariija saniniuujia, janiyari Sesaaca nia pueretaani, nojuaja mariqui nia sapojoreeri Cristoocujajini nia rupatenura, taa cuno Susanacu sapojoquiaari Eva tariucuacaanucuaani. <sup>4</sup>Cuno sapojonujuaca tiuquijiosacari niaacua, tamaatia nojori pohuatanura Jesujiniji niajaniya, niari jaarajaaja ritia na tojiquiaa. Nojori niishitijosanoori tojetaarucujanaa tamaatia canaa niishitijosanojiniji niajaniya. Nojori nia tojishacari, niari juhuajaniya samaruhua niishishano

tojitiaquiaajuhuj. Niaacuajaari tari tiuquuaari Jesucristoocua, Pueyaso jiyanooniuria nijaniya. Saniniuujia, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhuj. <sup>5</sup>¿Cuno sapojonuujuaateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¡Janiyara maja! <sup>6</sup>Seetanujuanaa, majaari cua niishiniu maninuhuaqueenu cua pohuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaajanaa, tojishocoriquiano cutara. Maja najuhuanaj. Niaacuajaari cuno niishiya, pueyaracaanu saaja maninia cua miishacari nia niquiara, cua pohuatasanojinijinio.

<sup>7</sup>¿Casaara nia tojitiaa cuno pojori quiarijianijia, majaari saniniuujia nia tojitianu janiya? ¿Janiyateeri sesa miiquianu nijaniyani, cua masejoyaquinuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuaajaari tama cua cuaqueyajaaja mueyashitiquiaarini cua cumaquiniuria nijaniya. Naa cua miiniuucuatej, ¿cunoteeri sesa niaara? <sup>8</sup>Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. <sup>9</sup>Saniniuujia, nia tajinia cua quishacari, cua jitiaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jitiaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niquitioquiaari, cua panishano cua masetajara. Janiyari naa pueyaracaanu tama cua cuaqueyaja-

ja cojuaquiaani, maja cua taajetenura nijaniya cua panishano cua jitiaaquishacari. Janiyari naa miiniutianiya pueyaracaanu. <sup>10</sup>Cua Jiyaniijia Cristocuaajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuaajaari cumaneeca mashiniquijiojua canaajiniji”. <sup>11</sup>Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaari Acaya jiyajinia quiniaa Pueyaso pueyajiniji? Naa cua sequesacaritij, ¿janiyateeri nia paniyaquiyani? ¡Maja! Pueyasocuaajaari niishiya, janiyari jiyanojua nia panijiani.

<sup>12</sup>Nia sequereera casaara cua mashiniquijiaquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jyanishano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhuj, taa canaacuaani. Saniniuujia, nojori mashiniquijiosacari nia cumaneeca, nojori nia niquitiojonura nareja, naacuajiti maatia niishishiyari, inojoriiri jiyanojua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa nijaniya. <sup>13</sup>Seetanujuanaari, inojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhuanaj. <sup>14</sup>Cunoori maja jiyajeneta naa nojori miiniuriatej. Satanáscaajaari tama na cuaqueyajaaja jatanijia shacantuucara, juhua Pueyaso seru na

niquishaanura, pueya na sapojonura.  
<sup>15</sup>Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia miijiaa pueya nojori quiniuria. Nojoriiri naa miiquiaa, Satanás seya nojori quiniuucua. Naajaa, inojoriiri saniitosaanutaniya sesa nojori miiniuucua!

**Pablo pahuatasacari naquiya na miiniujiniji, Cristo jiyaramiquishano na quiniuucua**

<sup>16</sup>Socua nia sequenu pacuteyanijia, majaari nia jiyaniniu janiyari paatecani cua pahuatasacari tama janiyajinijiaaja. Niaa jaara jiyaniya janiyari seetanujua-naa paatecani, naajaa, rupaquijia cua tojitiare quenaaja. Janiyari juhua paateca tama janiyajinijiaaja niaara pahuatanu panijajaniuhuj, taa nia tojishano pueya miiquiaacuani. <sup>17</sup>Naa cua pahuatasacari tama janiyajinijiaajatej, cunoori maja cua Jiyaniijia Cristo pahuatesano janiya. Cunoori tama cua pahuatasanojuaaja, juhua paateca cua quishacari. <sup>18</sup>Naatej, taa queraatia Pueyaso rupaa pahuatanaa tama nojorinijiaaja pahuatanuquiaacuani, janiyari quiarijia naa tama janiyajinijiaaja pahuatanu panijajuhuj. <sup>19</sup>Jiyanohua niishijiaa nia quishacari, naari cuno paatecoori tojtiaquiaa juhuajaniya. Naatej, taa nia tojtiaquiaa cuno pojoricuaani, quiarijia cua tojitiarejuhuaj. <sup>20</sup>Naajuhuj, niaanaari juhuajaniya rejeretaquiaa cuno pojori, nojori jaara nia poonijotequiaa juhua nojori seya. Niaanaari nojori rejeretaquiaa nojori jaara nia jiitiasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoricua shiiniuquiquiaa saaja, naajaa, nojori soosacari niajaniya. Niaanaari juhuajaniya nojori rejeretaquiaajuhuj, nojori jaara nia jiquioco maseteriquia.

<sup>21</sup>iNojoriquiiri jiyaniijanucujanaa cutara! Saniniuujia, janiyari nojori naaqui caririquiyani juhua nojori cua quiaquiniuucua, maja naa canaa miiniuucua niajaniya, taa nojori miiquiaa sesa niajaniyacuani.

Naajaa, quiarijia cutara, janiyari tama janiyajinijiaaja pahuatanutaniyani, taa nojori pahuataquiaa juhua paateca tama nojorinijiaajaacuani. <sup>22</sup>¿Taa nojori sequequiaani? ¿Nojoritiniaari Hebreo\* pueya, Hebreo rupaa pocuajacajuhuj? Janiyajuhuj. Janiyari Hebreo pueyanohuj, Hebreo rupaa pocuajano. ¿Nojoritiniaari Pueyaso saquiriojoso Israel\* pueyajinijio? Janiyacuajaari Israel pueyacuajinio supuenohuj. ¿Abrahamtenaari nojori supuetana? Abrahamcuajaari cua supuetanajuhuj. <sup>23</sup>¿Nojoritiniaari Cristo jiyaramiquishano pueya? Janiya cutaraari seetanujuaana Cristo seruni. Janiyari jiyanohua soyani, juhua paateca naa cua pahuatasacari tama janiyajinijiaajatej. Naajaa, janiyari seetanujuaana nia sequeyani. Janiya cutaraari socua jiyanohua nojorinijii poonijioquiaari Cristorani. Janiya cutaraari pueyaracaanu caminiujiushaquiaari nujuatejojuajinia nujuatejonuni, Jesucristojiniji cua pahuatanuucua. Naajuhuj, janiyari pueyaracaanu caminiujiushaquiaari majacununi. Naajuhuj, janiyari pueyaracaanu cocuaatia miiquiaarini, pueya monu panishacari janiya. <sup>24</sup>Cuarta Judiocuacari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari carteya na majacusanu pueyano. <sup>25</sup>Naajuhuj, janiyari jiuujanaraca caminiujiushaquiaari macata piquiniuni. Tamacari, janiyari saitia jacusaaquiaarini. Shoniniacu caminiajia nia jaaretasacari

buquejinia, jiuujanaraca buqueeri tiuquittiaquiaari. Naa tamacari buque tiuquittiasacarijiuhuj, janiyari na raucua cuataquiaarini puetunu niucujanaa, niqiriyyatu juucanio. Cunoori quiquiaari puereeta shoniniacu caminia jiuujajinia. <sup>26</sup>Janiyari pueyaracaanu tiqiyocua rucuanajoja quiquiaarini. Naacuajitij, moocua cua niuuniujushacari, janiyari cocuaatia miiquiaarini. Naa cua rucuanajosacaritij, janiyari pueyaracaanu puereeta nohuasenujuaca quishaqui shocoquiaarini. Naajuhuj, tama cuarta Judiocuacajaarjia pueyaracaanu cua miitanu panijia, taucucanio. Puereetaari quiquiaarijuhua cua rucuanajosacari tiacajinia, tiqiyocua pueya quiyaquishaqui, shoniniacu caminiajiniano. Naajuhuj, puereetaari quiquiaari janiyara, cua jiyanihacari janiyari cuarta Pueyaso muerasu tajinia quiyani, saaja cua paraa nojori quishacari. <sup>27</sup>Jiyanohua cua poonijiosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijiuhuj. Janiyari noojiaqueya miaqueyaquiquiaarijiuhuj, jeya cua quiyaquishacari. Janiyari naquiya miiquiaari cua rucuanajosacari shiniquiaajinijuhuj, toqueeju cua quishacarijiuhuj.

<sup>28</sup>Janiyari naa naquiya miishaaquiaarini, mariyata tamaatia naquiya miiniujiuhuj. Naajuhuj, janiyari puetunu juucajanaa niishiriojoquiaani, taariquitijia Pueyaso muerasu maapue quiya puetunu jiyacajinijanaatej. Janiyari jiyanohua nojoriicua tacaquiaani. <sup>29</sup>Naacuajitij, tamonu cuarta Pueyaso pueyano jaara rejeretaquiriquia Sesaaca saniniujiushacari nojuaja, janiyari jiyanohua taraajeja nocuani. Tamonu jaara sesa miitishaare, janiyari na naaqui caririqiyajuhuj. <sup>30</sup>Niaa jaara paniya socua cua pohuatanura nijaniya tama

janiyajiniijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumueecani. <sup>31</sup>Pa Jiyaniijia Que Pueyaso cuajaari niishiya janiyari seetanujuanaa sequeyani. Nojuajanaa cuara pueyaracaanu maniniuhuaqueetasaaria cutara, maja nojuajiniji pohuataana. <sup>32</sup>Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quietunu paniriquiaa Jesucristojiniji cua pohuatanucua. <sup>33</sup>Naajaa, cuarta Pueyaso pueyari namitia cua roshinitiaquiaari shuquiriaatia, puereetuca canaasatujinia, cuno tiaca sohuaca tachua shuucuai. Janiyari naa mahuiquishaaquiaari cua paraacuajini.

**Pablo pohuatasano Pueyaso  
niquitishanojiniji nojuaja**

**12** <sup>1</sup>Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuatareera taa cua niquitishaaquiaari pa Jiyaniijia casaa jiyocuacaanuni. <sup>2</sup>Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojiniarani. Naa cua tacanishaanujinijitij, tari shocorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuaj. Saaja Pueyasocua jaari na niishiya. <sup>3</sup>Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua

sohuanu soj. Pueyasocuajaari na niishiya. <sup>4</sup>Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaajinia. Pueyasoori cua tenujuquiaari maja cua caminiujiuniuria jiyocuaaanu cua tojishano mijiria quiniaa pueyara. <sup>5</sup>Naa Pueyaso niqitiniucua janiyatej, janiya maara tama janiyajiniijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. <sup>6</sup>Naajuhuj, janiya jaara tama janiyajiniijiaaja pohuatanu paniriquiani, cuno maara seetanujunaan pohuatasano quiriquia, maja juhua paateca pohuatasano. Seetanujunaan majaari naa cua pohuatanu paniniu, pueya mariqui cua pohuatasanojiniji cua jiyaniriiri janiya jiyanhua maninia pueyanoni. Pueya cuaara niishiiria cutara taamueca pueyanote janiyani, saaja nojori namijia-ta nojori niqishacari cua miishano, tama nojori numaatajaaja nojori tojishacari cua niishitiojosanojuhuaj. <sup>7</sup>Pueyaso niqitishano janiyani, na niishitishano janiyajuhuj, cunoori puera jiyanhua maninia quiquiaari. ¡Cunoori jiyanhua cua timitiquiaari! Naaratej, janiyari cua cuaqueyajinia nootusaaquiaari juhua jihocatani, janiya mariqui pueya shocotajara quiriri. Cuno taajeta noonuuri Satanás miishano quiquiaari, na tacaatiniuria janiya. <sup>8</sup>Janiyari jiyanhua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujjanaraca pacutejoquiaari secojonuni. <sup>9</sup>Cua Jiyaniijiaari saaja cua sequequiaari: “Janiyacuajaari quia cumaquiniutianiya-

ni, cua panishano pueyano quia quiniucua. Saaja cunocuajaari quiara. Cua naatacuajaari socua jiyanhua poonijiotenu cua cumaaca sasaca cua pueyajinia, tamasaca niishiniuria cunoori seetanujunaan cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniucua pueyaracaanu. Naacuajitij, Cristo cumaacaari socua janiyajinia niqishaaquiaa poonijiyano. <sup>10</sup>Naacuajitij, janiyari shuquiriquiaani cumaacaaju pueyano cua quiniucua, Pueyaso cumaquiniuria janiya. Naacuajitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuj, janiya jaara cua panishano jitiaaquiriquiani, naajaa. Pueyaso cumaquishacari janiya, janiyari juhuajaniya rejeretaquiaani. Naajuhuj, janiya jaara naquiya miitiasaaquiaani, taraatia cua miishacari-jihua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacuajitij, janiya jaara tojetaarucua-jana cumaacaaju quiquiaani, janiyari jiyacari socua jiyanhua cumaacaraca quiquiaani, Pueyaso cumaquiniucua janiya.

**Pablo tacaashacari Corinto tiacajinia quiniaa Pueyaso muerasu maanuucua**

<sup>11</sup>Janiyari seetanujunaan juhua paateca tama janiyajiniijiaaja pohuatareeni, juhua pueya shocotaja. Niaacuajaari naa cua pohuaterree, niaacuaja naara cucuaji tacuyaquiquianu cua sesacaja pueyatej. Janiyanaari najuhua quijia pueyanoni. Naajaa, niaacuajaari niishiya, janiyari maja socua najuhua quijia cuno pojorijiniijini. Cuno pojori nia tojishano pueyani, nojoriiri tama na cuaqueyajaaja

jiyatecanu juhua seetanujuanaa Jesucristo jiyaramiquishano pueyara cutara. <sup>12</sup>Juhujaniya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacuajitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. <sup>13</sup>¿Janiyateeri sesa nia jiitiaquiaarini, Pueyaso rupaa cua niishitiojosacari niajaniya? ¡Maja! Janiyari nia miiquiaari maniniani, naajuhuj, taa cua miiquiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari niajaniya, niaata cua quishacari. Maja cutaraari cua mashiniquijionu quiquiaari cumaneeca niajaniyajiniji. ¡Cua jiyanoori cunora, jaara sesa quiquiaari niajaniyara! <sup>14</sup>Quiarijiani, janiyacuajaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jianiniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiitiasano casamiicua. ¡Janiyari saaja niaacua jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacuajitij, cua mashiniquijiyaquishacari cumaneeca niajaniyajiniji, janiyari seetanujuanaa juhua nia queni. <sup>15</sup>Janiyari shuquiriaatia tama cua cumaneecajaaja puecanutaniyani cua quishacari niata, socua cua niishitiojonura niajaniya. Naacuajitij, janiyari tama cua cumaacajaaja puecanutaniyajuhuj, niojia cua cumaquiniuria. Janiyara, noori taraatia: janiya jaara

socua nia paniquiaani, niaari socua jiyacatequiaa secaja nia paniniuria janiya.

<sup>16</sup>Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasaca niajaniyajinijionaaari soquecoya, janiya naasucuaaari jiyasohuaja nia cumaneeca nohuasejoquiaani, cua sauponuta niajaniya. <sup>17</sup>¿Seetanutejanaa pueyanaa? ¿Janiyateeri nia sajojoquiaari niaacua cua jiyaramiquishano pueyatani? ¿Nojortiiiri nia cumaneeca masequiaari? ¡Maja! <sup>18</sup>Janiyacuajaari Tito jiyaroquiaari niaacua na quianurani, na cumaquiniuria niajaniya. Janiyari nata jiyaroquiaari tamonu Pueyaso pueyanohujuhuj. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocuajaari cumaneecaacua jiaatiaashijia, juhua janiyajuhuj. Janiya Titota, canaacuajaari jianohua nia paniquiaani.

<sup>19</sup>Sacuaraatia canaacuara nia rimiaaquenuucua pueyanaa, naajaa, majaari nia jianiniu canaa tama canaacuajijiaaja tacuyani, juhua canaa nequesoreena nia quishacari. Saniniuujia, canaari niya Pueyaso niqiara nio naajiya niaacuarani, Cristo pueya canaa quiniuucua. Naajuhuj, puetunu cua sequesanojuanaa niajaniya nio cua naajiojiniani, cunoori cua cumaquiniuria niajaniya cua panishano pueyanaa. Janiyari naa nia nacasuyani, seetanujuanaa Jesucristo tojjijia nia quiniuria. <sup>20</sup>Janiyari puereyani, niaacua cua tiuquishacari, janiyari niaacua taraajenutaniyani cua riuritasacari niajaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojuani, jeecatoojua, niaari saniniuujia taraajenutaniya nia niishishacari taa cua miiniutaniya niajaniyani. Janiyari

puereyani niaa naasucuaari juayonuujutaajaa. Niaa naasucuaari niarta pueyano jiitiasanoocua jiaatiajaca quiyajaa. Niaa naasucuaari juaaniu porocua quiyajaa. Niaa naasucuaari tama nia panishanojuaaja miijiaca quiyajaa. Niaa naasucuaari niarta pueyacuara coriaacujojuaca quiyajuhua. Naajuhua, niaa naasucuaari niarta pueyacuara rimiaaquenujuaca quiyajaa. Naajuhua, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhua, pueyaracaanu nia juayonuujutanuucua.

<sup>21</sup>Naacuajitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiaca quiyajaa. Janiyari puereyajaaniuhua, janiya naasucuaari nujuquenutianiya cua taraajenuta noo sesa miijiaca pueyacuani, cuno pojori jaara sesa na miishano tarinitiaaquiuiuanujua. Noojiaqueya nijajaniyajiniioori sacuaaatia miijiaca quiquianujua: cararaatia miijiaca sacuaaatia, na camishoo maaji numuetucunu porocajuhua, naajuhua, majaari tama nojori cuaqueya panishanojuaaja nojori rejeten quiquiaa.

#### Socua Pablo nacasusacari Pueyaso pueya

**13** <sup>1</sup>Nioori quiniutianiya jiuujianaraca cua pacutesacari quianu niaacua. Tariucuacaanu Pueyaso rupaajinia, paari nio niishitiojosaaquiariini: querajaa pueya jaara mariyata pohuatane nojori niquishanojiniji, pa naata seetanujuanaa na pohuatasanoocua tiuuni cutara. Naajuhua, niaacua cua tiuquishacari, janiyari naa miiniutianiya cua nequesoreesacari cuno sesa miijiaca. <sup>2</sup>Pueyanaa, janiya jaara pacutequiaariuhua niaacua quianutej, janiyacuaajari puetunu nijajaniyajiniinio cuno sesa

miijiacajanaa piriyojoquiaarini. Quiarijiani, tucuaaanu cua quishacarijia, janiyari puetunu cuno sesa miijiacajanaa socua piriyojiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. <sup>3</sup>Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujuniani, taa nia niishiniu paniriquiaacuajani. Niaacuajajari tari niishiya, pa Jiyaniijia Cristoori maja na jiitiano nijaniya juhua

cumaacaju pueyano. Niaacuajari na cumaaca niquiquiaa tama nijajaniyajiniajaaja na saniitiosacari nijaniya. <sup>4</sup>Seetanujuanaa, Cristoori juhua cumaacaju quiquiaari jaara niyacutesanojinia teetesaaquiari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiitiaa. Naajuhua, canaa, na rupaa pohuatanaani, canaari naquiya miishaaquiaajaaniuhua saaja mijiria quiniaa canaa quiniucua, taa nojuaja quiquiaaricuaani. Saniniuujia, Cristo rupesano canaa quishacari quiarijiani, canaa cutaraari Pueyaso cumaacaracani, maninia canaa jiitianura nijaniya.

<sup>5</sup>Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujia, maja soj? ¿Niaate maninia miijiaca taa Pueyaso muerasu miiquiaacuani? ¿Majateerini niishiniu, niaa jaara seetanujuanaa Jesucristoocua tiuujia quiri, nojuajaari nioojiajinia quiya? <sup>6</sup>Naajuhua, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuujua. <sup>7</sup>Canaari Pueyaso secojoquiaa niaacuarani, tojetaarucujanaa sesa miyashijia nia quiniuria, maninia



Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Naa jaara naa maninia miijiacara quiriohua, majaari canaa saniitionu quiniutianiya nijaniya Pueyaso cumaacata. Naacuajitij, majaari pueya niqiniu quiniutianiya Pueyaso cumaaca canaa jiitiasano. Naajaa, pueya jaara jiyaniya canaa najuhuaa quijiaca pueyani, naajaa. <sup>8</sup>Canaa jiitiasano cumaacaari maja canaa saniitiotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria nijaniya, socua maninia Pueyaso Rupaa tojitiajaca nia quiniuria. <sup>9</sup>Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura nijaniya niaa jaara Pueyaso tojitiaashijaca quiriquia. Naacuajitij, canaari juhua cumaacaaju pueya niquishano quiniutianiyani, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. <sup>10</sup>Janiyari nio cua naajioneejinia jiyanohua nia nacasuyani tucuaaanu cua quishacarijia, maja

jiyanohua cua nacasunura nijaniya, niaacua cua tiuquishacari. Pa Jiyanijiacuajaari cua jiyatequiaari juhua nia jiyaniijia cua quiniuria, na cumaacata cua canashitijionura nijaniya, seetanujuanaa cumueeca na muerasu nia quiniuria. Pueyaso niquitiosano na cumaaca janiyari maja cua sesonura nijaniya.

<sup>11</sup>Cua tucuatunura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniucua jiaatiajaca nia quiri. Nioojia nia cumaquiri, maninia cua rootasanota. Naajuhuj, nia jiyanoootooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jiyanoojiajuhuaj. <sup>12</sup>Pueyanaa, Pueyaso tojijia nia quiniucua, nia saruhuajotooriquia nujuunuta, seetanujuanaa nia paniniutia niarta Pueyaso pueya. <sup>13</sup>Puetunu niquijinio parta Pueyaso muerasujuanaari cua sequeya cua saruhuatunura nijaniya.

<sup>14</sup>Pa Jiyaniijia Jesucristo cuaara cumaquiria nijaniya pueyaracaanu. Nijaniya cuaara quiiria pa Que Pueyaso panishano pueyaracaanujuhuj. Naajuhuj, niaa cuaara quiiria Pueyaso Sohanu rupesano pueyaracaanu. Puetunu nijaniyajanaa cuaara naa quiiria.